

**MESYUARAT KEDUA, PENGGAL KEDUA,
PARLIMEN KETIGA BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : YB. Tuan William @ Nyallau anak
Badak
[Lubok Antu]**

TARIKH : 12.06.2014 (KHAMIS)

NO. SOALAN : 137

Minta **MENTERI KEMAJUAN LUAR BANDAR DAN WILAYAH** menyatakan kenapa tidak ada tindakan serius diambil ke atas kontraktor yang gagal menyiapkan pelaksanaan projek elektrik luar bandar yang begitu lama tertangguh khususnya di kawasan Parlimen P.203 Lubok Antu.

JAWAPAN:

Tuan Yang Di-Pertua,

Pelaksanaan projek Bekalan Elektrik Luar Bandar (BELB) di negeri Sarawak dilaksanakan secara berperingkat-peringkat dan kebiasaannya mengambil masa 24 bulan untuk disiapkan. Berdasarkan rekod Kementerian, tiada projek BELB yang lewat disiapkan di kawasan Parlimen Lubok Antu. Sehubungan itu, Kementerian sangat mengalu-alukan maklumat daripada Yang Berhormat supaya projek yang didakwa lewat dilaksanakan dapat disiasat dan diambil tindakan.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' KAMARUL BAHARIN BIN ABBAS
[TELOK KEMANG]**

TARIKH : 12 JUN 2014 (KHAMIS)

SOALAN :

DATO' KAMARUL BAHARIN BIN ABBAS [TELOK KEMANG]
minta **PERDANA MENTERI** menyatakan :-

- (a) apakah status pinjaman Kerajaan kepada Bumiputera melalui Amanah Ikhtiar Malaysia (AIM) sebanyak RM1.7 bilion, Tabung Ekonomi Kumpulan Usaha Niaga (TEKUN) sebanyak RM1,208 juta dan Majlis Amanah Rakyat (MARA) sebanyak RM26 juta sama ada telah dibayar kembali ataupun tidak; dan
- (b) indikator keberkesanan pinjaman-pinjaman ini dalam membantu menaikkan ekonomi Bumiputera.

JAWAPAN: YB SENATOR DATO' SRI ABDUL WAHID OMAR,
MENTERI DI JABATAN PERDANA MENTERI

Tuan Yang di-Pertua,

- (a) Untuk makluman Ahli Yang Berhormat, sehingga 30 April 2014, keseluruhan pinjaman Kerajaan kepada Amanah Ikhtiar Malaysia (AIM), Tabung Ekonomi Kumpulan Usaha Niaga (TEKUN) Nasional dan Majlis Amanah Rakyat (MARA) adalah sebanyak RM2,811.6 juta. Pecahan keseluruhan pinjaman adalah seperti berikut:

BIL	AGENSI	PINJAMAN (RM JUTA)
1	AIM	858.0
2	TEKUN	1,463.6
3	MARA	490.0
JUMLAH KESELURUHAN		2,811.6

Sehingga 30 April 2014, status bayaran pinjaman bagi agensi terbabit adalah seperti berikut:

BIL	AGENSI	BAYARAN (RM JUTA)	BAKI PINJAMAN (RM JUTA)	TUNGGAKAN (RM JUTA)
1	AIM	75.4	782.6	45.4
2	TEKUN	157.6	1,306.0	0
3	MARA	80.9	410.0	0
JUMLAH KESELURUHAN		313.9	2498.6	45.4

*Nota: baki belum selesai adalah merupakan jumlah bayaran balik yang masih belum mencapai tempoh matang.

Manakala jumlah pembiayaan yang telah diberikan kepada usahawan Bumiputera sejak tahun 2008 sehingga kini di bawah agensi terbabit adalah seperti berikut:

BIL	AGENSI	KELULUSAN PEMBIAYAAN (RM)	PENERIMA PEMBIAYA (BIL)
1	AIM * Sehingga 31 Mac 2014	7,893,116,918	301,342
2	TEKUN * Sehingga 30 April 2014	2,144,333,750	165,263
3	MARA * Sehingga 30 April 2014	3,052,815,003	60,698
JUMLAH KESELURUHAN		13,090,265,671	527,303

(b) Tuan Yang di-Pertua,

Pemberian kemudahan pinjaman oleh agensi terbabit kepada usahawan Bumiputera terbukti berkesan dalam membantu menaikkan ekonomi Bumiputera. Melalui kemudahan pembiayaan yang disediakan, keupayaan syarikat Bumiputera bukan sahaja dapat ditingkatkan, malahan ia mampu memberi kesan kepada peningkatan taraf hidup Bumiputera.

Berdasarkan kajian AIM pada tahun 2008, menerusi pinjaman mikro kredit AIM, usahawan Bumiputera telah berjaya meningkatkan purata pendapatan isi rumah daripada RM524 kepada RM2,635.23 iaitu peningkatan sebanyak 402.91 peratus.

Manakala berdasarkan bancian yang dijalankan oleh TEKUN Nasional pada tahun 2013, sebanyak 46 peratus usahawan yang menerima pinjaman TEKUN telah menunjukkan

peningkatan jualan melebihi 30 peratus ke atas. Tahap kejayaan program TEKUN ini juga dapat diukur melalui pinjaman ulangan yang dilakukan oleh usahawan. Pemberian pinjaman ulangan adalah berdasarkan kepada pencapaian dan peningkatan perniagaan usahawan di samping mempunyai rekod bayaran balik yang baik. Sehingga April 2014, sejumlah 82,929 pinjaman ulangan bernilai RM1.13 billion telah dikeluarkan kepada usahawan seluruh negara.

Tuan Yang di-Pertua

Pelaksanaan program pembiayaan di bawah MARA misalnya, juga telah melihatkan keberkesanaan di mana rata-rata penerima pembiaya telah mampu meningkatkan jualan dan pendapatan syarikat. Berdasarkan kajian *outcome* tahun 2012 bagi Program Skim Pembiayaan Kontrak Ekspres (SpiKE), sebanyak 97 peratus penerima pembiayaan telah berjaya meningkatkan keuntungan dan pendapatan syarikat melebihi 25 peratus daripada sebelumnya.

Manakala di bawah Program Skim Pembiayaan Mudah Jaya (SPiM) pula, penerima pembiaya telah berjaya mencatatkan peningkatan jualan sebanyak 38.1 peratus dan pertambahan bilangan pekerja sebanyak 27.3 peratus. Selain itu juga, peningkatan dalam aset bersih perniagaan sebanyak 43.2 peratus juga ditunjukkan melalui kajian *outcome* yang dijalankan.

Sehubungan itu, ini membuktikan bahawa program berbentuk pinjaman adalah relevan dan wajar diteruskan memandangkan penyediaannya banyak membantu dalam meningkatkan perniagaan dan pertumbuhan ekonomi Bumiputera.

Sekian. Terima kasih.